



## INATSIARTUNI

Partii Inuit  
Randi Broberg

UPA 2014/57-1  
6.5.2014

**Arnat angutillu ajornartorsiornerminni qimarngusariaqalernerminnilu naligiinnerusumik sullinneqarsinnaanissaat siunertaralugu Nunatsinni qimarnguiit atornerqarnerat pillugu aammalu tassunga tunngatillugu qimarnguiit pisariaqartinneqarnerat aammalu kommunit allallu qimarnguinnik ingerlatsiumasut nutaamik qimarnguiliortoqarnissaanut imaluunniit pioreersut iluarsartuunneqarnissaanut periarfissaqartinneqarnissaannik misissuisoqarnissaa siunertaralugu qimarnguiit pillugit Naalakkersuisut misissuineramik ingerlatsinissaannik Inatsisartut aalajangiiffigisassaattut siunnersuut**  
(Inatsisartuni ilaasortat Knud Kristiansen aamma Gerhardt Petersen, Atassut)

Partii Inuit tunngaviusumik isumaqataavugut, sumiluunniit sullinneqarnermi arnat angutillu naligiimmik pisinnaatitaaffeqarlutik sullinneqarsinnaasariaqartut.

Taamatullu ippoq qimarnguiit eqqarsaatigalugit, periarfissanik neqerooruteqarnermi arnat angutit meeqqallu naligiimmik periarfissaqartariaqarmata.

Siunnersuuteqartut isumaqatigaagut, taamatullu siunnersuut ingerlateqqinneqassasoq isumaqatigalutigu.

Taamaattoq kaammattuutigerusupparput, qimannguippassuarnik inerisaalertinnata, pinaveersaartitsineq ilaqutariinnillu ajornartorsiortunik ikiorsiinissamut periarfissat annertusarneqartuariaqartut, ilaqutariittut nukittunerulernissamik ajornartorsiutinillu oqaloqatigiinnikkut qaangiisinaanermik sakkussanik tuniorarneqarnissamik tikkuussisunik.

Maannamut inuiattut aaqjissuussaanitsinni aningaasarpasuit ajornartorsiutinut piulereersunut atortarpavut, uffa massa ajornartorsiutit pilinnginnissaannut aningaasanik annertunerusunik atuigutta imminut akilesinnaanngiinnaranani inuttut inuiattullu toqqissisimanerusumik inuuneqalernissarput qularnaanerusinnaallutigu.

Taama oqaaseqarluta, naalakkersuisut pineqartumut suliniuteqarnerat aamma qutsatingaarput.

